

44.3441

WZ2

4

44.3441

WZ2

4

宋詩鈔

(全 四 册)

統一書號: 10018·586

定 價: 28.65 元

借書日期表

# 宋詩鈔

第四冊

吳之振  
呂留良選  
〔清〕  
管庭芬  
吳自牧  
蔣光煦補

中華書局

〔清〕

管庭芬  
蔣光煦  
補

宋詩鈔補

## 宋詩鈔補序

涵芬樓既重印《宋詩鈔》，以原本著目，闕詩者凡十六家。曾謀於義寧陳散原先生，將董理補輯，以成完書。會聞吳興劉君翰怡，從吳縣柳蓉村得別下齋舊藏本。急以重值相易，審視藏印宛然，其署簽爲海寧管芷湘庭芬鈔補，蔣生沐光照編輯。蓋原闕十六家，既均補鈔，他家名作，亦多最錄。總爲詩二千七百八十首，爲力勤矣。別下齋藏書著稱於海內，而補鈔復爲管氏所編定，體例精善，同於原書，用付印行，以副初志。夫我國秘籍孤本，往往以收藏家不卽校刊，半委蠹蠹。涵芬樓今以此本曝於天下者，蓋欲使秘籍孤本，不終闕也。斟印將竟，吾友山陰諸真長，復得熊心松爲霖《宋詩鈔補》三冊於京師，爲嘉應黃公度遵憲人境廬故物。雖僅補原闕十六家，而甄采較此編爲富。惜中佚一冊，不知流轉何所？今真長亦以此本歸涵芬樓，俟覓得所佚，當再墨木。嗟乎！吳、呂手定之書，歷二百年而始重印。而管氏此編，亦適於此時出。於存亡絕續之交，使嗜宋詩者得以資其研討，是亦文字之靈，不終沒於天壤也夫。乙卯四月，閩縣李宜龔序。

## 小畜集補鈔

王禹偁，字元之，鉅野人。九歲能文。太平興國八年登進士。歷右拾遺，拜左司諫。廬州妖尼道安誣訟徐鉉，禹偁請論道安罪，貶商州團練副使。累遷翰林學士，坐謗訕，知滁州。真宗卽位，召知制誥，出知黃州，卒。有《小畜集》。

### 寄商州馮十八仲咸同年

遷客秋來捧詔還，故人多怪鬢毛班。重爲東掖垣中士，猶夢西暉亭下山。薄憶宦情皆是幻，老思身計不如閒。何時獲約同歸隱，水竹蕭蕭但掩關。

### 移任長洲

移任長洲縣，舟中興自餘。篷高猶見月，棹穩不妨書。雨碧蘆枝亞，霜紅蓼穗疏。此行紆墨綬，不是爲鱸魚。

移任長洲縣，窮秋入水鄉。江涵千頃月，船載一篷霜。竹密藏魚躍，雲疏漏雁行。故園漸迢遞，烟浪自茫茫。

絕句

謫官無俸突無烟，唯擁琴書盡日眠。還有一般勝趙壹，囊中猶貯御書錢。

齊安郡作

憶昔西都看牡丹，稍無顏色便心闌。而今寂寞山城裏，鼓子花開亦喜歡。

題錢塘縣羅隱手植海棠

江東遺蹟在錢塘，手植庭花滿縣香。若使當時居顯位，海棠今日是甘棠。

明月溪

汎流者爲誰，人骨皆已朽。我來尋故跡，溪荒亂泉吼。惜哉幽勝事，盡落唐賢手。惟餘舊時月，團團照山口。

望日臺

荒臺隱層巒，雲磴踰百尺。攀蘿試一登，依然有遺跡。掌舒舊砌平，屏卓諸峯直。憑高聊寓望，孤懷念鄉國。長安不可見，但對金烏赤。傾盡葵藿心，庶免浮雲隔。

## 鳳凰陂

次公治潁川，仁政被一方。神物不藏瑞，茲焉集鳳凰。在昔奏《簫韶》，舜庭來躊躇。西伯有至化，亦見鳴岐陽。仲尼豈無德，已矣空悲傷。夫何刀筆吏，而能致殊祥。我來過荒陂，煙草但蒼蒼。緬懷漢循吏，史筆恐未遑。

## 惠山寺留題

吟入惠山山下寺，古泉閑挹味何嘉。好拋此日陶潛米，學煮當年陸羽茶。猶負片心眠水石，略開塵眼識煙霞。勞生未了還東去，孤棹寒篷宿浪花。

## 中秋月

何處見清輝，登樓正午時。莫辭終夕看，動是隔年期。冷溼流螢草，光凝宿鶴枝。不禁雞唱曉，輕別下天池。

## 官舍書懷呈郡守

年來潘令鬢初凋，瘦馬青衫恥下僚。藥債漸多醫宿疾，宦情猶切戀明朝。空江梅雨添幽鬱，古縣桃花鎖寂寥。賴有郡侯知己在，每憐憔悴費金貂。



### 朝退偶題

吏隱金門祇似閑，退朝窮巷懶開關。經年不到公卿宅，五日空隨侍從班。禁漏出花寒歷歷，御泉通市細潺潺。功名未立年猶少，爭忍攜琴去舊山。

### 送郝校書從事相州

提筆從戎別帝鄉，官清兼領校書郎。將軍幕下紅蓮媚，詩客袖中丹桂香。吟倚旌旗春過雨，醉聽刁斗夜含霜。金臺莫作多時計，非久應歸振鷺行。

### 送夏侯正奉使江南

百舌關關麥隴青，遠山迎馬翠如屏。禁中已誦相如賦，江外猶看使者星。衣拂茶煙尋水寺，枕欹梅雨泊沙汀。歸期莫過中秋節，待宴甘泉月滿庭。

### 和陳州田舍人留別

宛丘分理藉賢明，暫輟詞臣撫百城。職罷掖垣人共惜，郡連京輔自爲榮。休吟紅藥階前色，且聽長淮枕上聲。駐馬都門相別處，柳黃莎碧上林鶯。

### 硤石縣旅舍

霜乾紅葉飛，遷客思淒淒。處險人垂瘦，登山馬跼蹄。籬荒蛩韻苦，雲凍鴈行低。此夕應無寐，何煩報曉雞。

### 和與廬氏宋少府話舊遊

舊遊前政一追尋，宦路遷移敵古今。黃綬位卑曾歎命，青宮官冷不妨吟。煙嵐不改當窗色，桃李應垂滿砌陰。好寄新詩題舊壁，爲言梅福珥朝簪。

### 春郊寓目

百舌嬌慵未苦啼，雪隨春水下松溪。何人樵樹和雲斫，幾處山田帶雨犁。蜀柳半開鸛鵲眼，海棠深結麝香臍。東風似待閒人出，一路青莎襯馬蹄。

### 春郊獨步

襟袖飄飄晚吹輕，孤吟何必共人行。綠楊繫馬尋芳徑，春草隨人上古城。不憤黃鸝誇巧舌，多慚戴勝勸歸耕。憑高朗咏沉湘賦，自許吾生是賈生。

### 送馮中允之任婺州

東南宦迹多勝遊，婺女星下溪山幽。嚴陵隱德七里瀨，沈約詩名八詠樓。岸上黍離經故國，湖邊木脫正高秋。承明三人妨賢久，擬覓江鄉小郡侯。

瑯琊山

連峯復岩嶠，峯巒架沈寥。流名自東晉，積翠滿南譙。洞碧通仙界，溪明潤藥苗。古臺臨海日，絕頂見江潮。杉影擎雲暗，泉聲出竹遙。廟碑傳漢祖，寺額認唐朝。早歲時霜稼，靈蹤合禁樵。詩章因我盛，屏障遣誰描。近住人多秀，頻登酒易銷。圖經標八絕，濤霍合相饒。

和廬州通判李學士見寄

北門西掖久妨賢，出入丹墀近八年。且把一麾淮水上，敢思三接浴堂前。將何政述稱循吏，豈有文章號謫仙。除却清貧入詩詠，山城坐客冷無氈。

送董諫議之任湘潭

依依行色滿帆檣，又借仁風惠遠方。暫去長沙非賈誼，猶虛計相待張蒼。檻前波浪瀟湘闊，雨後汀洲橘柚香。翰苑逐臣知最幸，願聽民訟繼甘棠。

櫻桃漸熟牡丹已凋恨不同時輒題二韻

紅芳落盡正無憀，吟遶空枝首重搔。最恨東君少才思，不留檀口待櫻桃。

病中書事上集賢錢侍郎

力疾奉朝謁，歸來倦送迎。老爲儒術悞，瘦愛道裝輕。羅藥幽香散，移琴細韻生。晨餐漸有味，筍蕨倍關情。

妻兒慣蔬素，僕馬任龍鍾。一榻渾無物，孤琴對病容。風翻簾影亂，旱減井痕重。幽寂誰爲伴，扶行賴瘦筇。

### 送譚殿院之任南陽

大抵人生樂故居，山川況復漢南都。別來墳墓有宿草，歸去田園多綠蕪。銀印莫羞雙鬢白，錦衣兼照兩轡朱。西垣衰病無僇客，空羨此行歌袴襦。

### 對酒吟

勸君莫把青銅照，一瞬浮生何足道。麻姑又採東海桑，閨苑宮中養蠶老。任是唐虞與姬孔，蕭蕭寒草埋孤塚。我恐自古賢愚骨，疊過北邙高突兀。少年對酒且爲娛，幾日樽前垂白髮。安得滄溟盡如酒，滔滔傾入愁人口。從他一醉千百年，六轡蒼龍任奔走。男兒得志升青雲，須教利澤施于民。窮年高枕卧白屋，蕙帶藜羹還自足。功名富貴不由人，休學唐衢放聲哭。

# 騎省集補鈔

徐鉉，字鼎臣，廣陵人。仕南唐，累官翰林學士。歸宋爲直學士院給事中、散騎常侍。淳化初，坐累，黜靜難軍司馬，卒。有《騎省集》。

## 吳王挽辭

倏忽千齡盡，冥茫萬事空。青松洛陽陌，白草建康宮。道德遺文在，興衰自古同。受恩無補報，反袂泣途窮。

土德承餘烈，江南廣舊恩。一朝人事變，千古信書存。哀挽周原道，銘旌鄭國門。此生雖未死，寂寞已消魂。

## 和元帥書記蕭郎中觀習水師

元帥樓船出治兵，落星山外火旗明。千帆日助江陵勢，萬里風馳下瀨聲。殺氣曉嚴波上鷁，凱歌遙駭海邊鯨。仲宣一作《從軍詠》，迴顧儒衣自不平。

## 安陽集補鈔

韓琦，字稚圭，相州安陽人。弱冠舉進士第二，方唱名，太史奏日下五色雲見。累官至右僕射、侍中，歷儀、衛、魏三國公，出備兩鎮。卒，年六十八，贈尚書令，謚忠獻。有《安陽集》。

### 答袁陟節推遊禪智寺

春去惜餘景，偶來郊外觀。蕪城千古恨，一顧殊悲酸。荒祠枕大道，尚記吳城邛。遠近綠陰合，水襯紅莢殘。隨麥齊若翦，隨風卷波瀾。罷農喜有望，守臣心粗寬。蕭疏禪智寺，壞址不甚完。叢花亂芍藥，籬竹摧琅玕。空有亭亭柏，成行如筆端。供帳具朝膳，僚衆成清歡。小杜詩板暗，樂石曾未刊。乘興詣茶圃，百步登平巒。摘焙試烹啜，甘挹零露漙。午過倦微暑，堤路騰歸鞍。天子憂歲旱，引咎古所難。列郡承新詔，朝夕弗敢安。況此行春意，固不在遊盤。

### 臘日出獵近郊

悲風吼林霜草白，殺氣稜稜慘空碧。因收講事比其時，況值嘉平農已隙。暫整和門出近郊，獵獵旌旗原燒赤。狩場一望天四垂，貔虎意豪猶恨窄。鼓動圍開翼復箕，人知部分如刀劃。飛走竄伏不得暇，狡兔幸生猶奮擲。飢鷹眼捷翅頭健，下韉風發無虛擲。鵠拳交擊或未仆，繼喉韓盧追以咋。忽穿叢薄

失所捕，恥焉便縱摩霄翮。不似寒鴟得腐鼠，傲然有視鴛鵲嚇。烏鵲鵲雉曷足數，亦有晨風競搜索。其間駭獸欲陵突，悍卒爭趨矜手格。前驅反旆弗及舍，丘山大委虞中獲。翻車瀉酒犒士衆，萬刀割肉恣燔炙。塞防寓令豈徒然，不在詩人刺荒癖。王者設官猶取衆，大姦宿猾許擒扼。乘時廢職莫自效，勿謂鷺鳥無全策。別有老狐智計巧，只就高城營窟宅。疑冰識扱行步穩，此日胡由見踪跡。鵬兮鵬兮未得志，將軍憤懣如何釋。

### 病鶴貽劉易

塵寰病思苦，仙府歸魂勞。禿翼敗風霞，卑棲掩蓬蒿。池園擯時玩，雞臯豈吾曹。誰知牢落心，萬里孤雲高。

### 遊開化寺

開化得地勝，崇修何代作。全山鑱佛身，萬木亘高閣。煙霞無四時，爲我張幄幕。飛泉乘空來，直在庭砌落。松柏森成行，鬬狀蛟龍惡。如整萬人陣，偏伍不敢錯。距城纔一舍，曠絕類霄堦。噫吾何自勞，日窘吏事縛。到官踰二期，未克造林壑。引疾得鄉邦，畫錦行遂著。猛拋公几煩，不負真境約。精廬始一登，百慮已澄却。徘徊延賓僚，開席盛燕酌。歌留嶺上雲，吹亂風前鐸。勿譏清賞累，粗繼東山樂。

## 離并州至晉祠次韻答宣徽富公

公名傑出天下賢，終身師慕常顓顓。十年一面數日別，行行不忍移歸輶。剛腸出淚收還注，感公知己難違去。黃昏病作宿荒城，離緒不堪紛似雨。

## 孫賁書記以齊安舊文爲示感而成詠

余兄天聖中，尚抑齊安守。余遭所生憂，得歸侍左右。孤覺獲苟存，朝夕賴誨誘。兄材無不宜，吏治孰可偶。公庭常寂然，所樂在文酒。臨江三四樓，次第壓城首。山光拂軒檻，波影撼窗牖。原鴇款集間，萬景皆吾有。兄詩豪且奇，氣餒摩星斗。優遊預賡和，惟自愧荒醜。于今四十年，日月甚奔走。當時相聚者，十已喪八九。嘗爲春亭記，烏敢示不朽。孫君里中來，云亭廢已久。徒有舊文在，況足失其手。兄後見曾孫，弟老成衰叟。一身雖寵榮，百慮鎖紛糾。何如昔日歡，投泣念愛友。

## 周沆著作宰秀州嘉禾

庇身名邑得嘉禾，銅墨猶嗟滯俊科。前席未期宣室召，聞絃還繼武城歌。酒旂穿柳春堤迴，魚艇藏花夕唱和。對此不勞披縣譜，且求新句解詩魔。

## 叔平學士知青州

厭直圖書府，思爲海岱州。郡符分竹使，親膳潔蘭羞。文石輪忠密，仙山進職優。過家門納驪，卜地隴



眠牛。暮霰凌羈玉，朝曦艷戟油。恩寬敷漢札，政善洽齊謳。冰際春芳盛，尊中客醞浮。物饒三服麗，居樂五民遊。松鬣低容宴，峯螺翠入樓。行聞西掖召，真賞莫淹留。

館直二闕

玉山岑寂雪花乾，仙掌風高露未溥。自笑曼都凡格在，一宵無奈月邊寒。章溝傳漏過三更，霜壓寒威特地生。苦恨回環窗外鐸，幾番幽夢不教成。

和邃卿學士雪霽登秘閣

曉來延閣步層梯，春色周圍一望低。殘雪半留珠殿北，非煙長護綺窗西。幽情自逐歸鴻斷，芳意還因遠樹迷。金匱有書猶未見，密封香篆鎖芝泥。

上巳前與同舍出郊過金明池

天波新綠染成春，波面輕風起細鱗。隔岸鳥聲低弄曲，出牆花豔遠含嚬。柳經傷別還多緒，鷗鷺忘機不避人。三月偷遊仙署友，肯思迢遞走征輪。

和春卿學士登廣文閣觀京闕之盛

層閣鬱嵯峨，登臨逸意和。雨餘春物動，天闊夕陽多。棋布金杯第，環通璧沼波。泥中足車騎，應笑翟公羅。